

NTE EKEKAMADE MME OKU YE MME LEVI

Numbers 18:1-32
OYOHQ UKPEP-N̄KPO 98

Eke Mkparawa

IKQ IBUOT: “Eno, ndien eyeno mbufo” (Luke 6:38).

Utom Mme Levi

Mme Levi ema eyak idem mmọ saña-saña eno ndinam akpan utom nno Abasi, ndien Enye ama onọ mmọ ifet ndinam utom ke ufok Abasi. Utom mmọ ekedi ndiñwam mme oku ke ini ukpono Abasi ke ataya, okoro ye ndimen Ataya oro kpukpru ini eke nditọ Israel edahade isañ. Ke mme ukperedem isua, ke nditọ Israel ema ekeduk ison eñwoñ, ema emek ndusuk ubon emi etode esien Levi enim nte mme ebre ñkpọ ikwọ ke ini ukpono Abasi. Nditọ Asaph, Heman ye Juduthun ekedi mme ebre ñkpọ ikwọ ye mme andikwọ ikwọ ke akwa otu mme andikwọ ye mme ebre ñkpọ ikwọ eke nti mme andikpep ekekpepe. (1 Chronicles 25:1; 15:16-22; 2 Chronicles 5:13).

Ikwọ ekedi ata akpan ñkpọ ke edu ukpono Abasi Nditọ Israel. Nnyin imokot ite: “Ndien Hezekiah odohọ mmọ, ete ewa edifop uwa ke itie-uwa. Ndien ke ini edifop uwa otōñode, ikwọ Jehovah onyūñ otōñ, ye mme ukorowo, esaña ye ñkpọ-mbre David edidem Israel. Ndien ofuri esop etuak ibuot, mbon-ikwọ enyūñ ekwọ, mme andifuri enyūñ efuri ukorowo; enam kpukpru ñkpọ emi, tutu ema edifop uwa” (2 Chronicle 29:27, 28). Nnyin imokut ñko ite ke edi mbon ikwọ nditọ Levi emi; Asaph, Heman ye Jeduthun ekewet ediwak Psalm.

Inyeneke Udeme Ke Canaan

Ema etim ediañade mme Levi enim saña-saña eno edisana utom Abasi tutu mmọ ikobohọ udeme mmọ ye nditọ ete mmọ ke Canaan. Ekeno mmọ mme obio emi mmọ eduñde, ye adaña ison emi ekemde ufene mmọ, edi mmọ ikenyeneke ndinam utom okuk, inyūñ inyeneke unen ke ukara idut oro. Mmọ ekenyene ndiyak ofuri ini mmọ nno ke ndinam utom Abasi.

Abasi ama otim etiñ enyin ke ndisana ikot Esie. Enye ama odohọ ete ke Imọ iyedi udeme mmọ. Mmọ ema eyak ini mmọ ye ekikere mmọ esin ke utom Esie, enyūñ edorenyin ndidia nto ubok Esie.

Apostle Paul ama etiñ abaña nte ekpekamade mme okworo-ikọ ke ini enye okodohode ete, “Nte mbufo ifiokke ite mmọ emi enamde utom temple edadia se itode ke temple? Mmọ emi edade mbet itie-uwa ebuana udeme-udia ye itie-uwa? Kpa ntre ke Obon ebieren onim, ete mmọ emi ekworo Eti - mbok ekpeda se itode ke Eti-mbuk edu uwem” (1 Corinth 9:13, 14).

Ke Ufot Mme Odu Uwem Ye Mme Akpa-Mkpa

Abasi oyom mme okworo-ikọ oro eda mme ikọ uwem esok otu owo, oro edi, oyom mmọ “ekpeme udim-eron.” Ana nte mmọ enyene ima Abasi ke esit mmọ, okoro ye Spirit Abasi ke uwem mmọ ndida ñkpep mme owo usuñ Heaven. Mme okworo-ikọ enyene akamba utom, ndida ke ufot mme odu uwem ye mme akpa-mkpa, ndinyūñ nno mme owo ntot ete efeñe ebọhọ ubiere-ikpe eke edidide.

Abasi ama odohọ Ezekiel ete edieke andikpeme okutde nte ofut edide ndien inohọ mme owo ntot, eyeyom iyip mmọ ke ubok esie. Abasi onim mme okworo-ikọ Esie nte mme andikpeme, ndien ana nte mmọ enyene spirit Abasi ke uwem mmọ man ekeme ndinọ mme anam-idiok ntot ete ekabare ekpon mme idiok-ñkpọ mmọ enyūñ ebeñe idem ndisobo ye Obon.

Ebọhọ Oto Erinam Akpanikọ Mme Oku

Aaron ye nditọ iren esie, mme oku, ekesifop uwa ke ibuot Nditọ Israel ke ini emi mmọ enamde idiok-ñkpọ, mikpedighe ntre Abasi okpokosobo mmọ. Ke ediwak idaha, mkpa ikpohidem ama esisim anam idiok-ñkpọ ke ndo-ndo oro enye eduede. Ini kiet, ke ini Nditọ Israel ekesukde Moses uyo, enyūñ ekunide ebaña nte mmọ ekekponde Egypt, Abasi ama odon urukikot ete odom mmọ. Ediwak emi urukikot okodomde ema ekpaña. Moses ama obon akam abaña mmọ emi ufen emi okosimde, ndien Abasi ama owut mbom onyūñ odohọ Moses se edinamde man anyaña mmọ osio ke mkpa (Numbers 21:4-9).

Ini efen, Nditọ Israel ema esuk uyo koro Abasi okosobode mme idiok owo ke ntak mme idiok-ñkpọ mmọ. Abasi ama oyom ndisobo ofuri nna Israel ke ntak idiok-ñkpọ oro, edi Moses ye Aaron efiak ebon akam eti-eti ete Abasi efen onọ mmọ. Moses ama odohọ Aaron ete ada ikañ ke ñkpọ ufop ufuon-ñkpọ, aka usop-usop ke ofuri esop Israel onyūñ anam uwa usio-isop onọ mmọ koro ubierikpe Abasi ama ototōñ ndisim Nditọ Israel nte idiok udon. Aaron ama

efehe usop-usop nte Moses okodohode enye, edi owo 14,700 ema ekpakpaña kaña. Ofuri esop Israel ekpekekpaña edieke oku oro mikpakadaha “ke ufot mme akpa-mkpa ye mme odu uwem” (Numbers 16:41-50).

Ikpenyene didie esit ekom ibañá nti mme okworo-ikó emi enyimedede ndiyak mme usuñ ye udon idem mmó man etim etiñ enyin ke idem ikot Abasi! “Imebeñe mbufo, ndito-ete, ite edioño mmó emi enamde utom ke otu mbufo, enyuñ ekarade mbufo ke Obon, enyuñ enode mbufo item. Ekpono mmó eti-eti ke ima ke abañá utom mmó” (1 Nwed Thessalonica 5:12, 13).

Mme Levi emi ekesuhorere ke idaha ekan mme oku, ema enyene utom nko ndinam, emi edieke mmó ekpetrede ndinam, akpanam mme owo ekpaña. Abasi ama owuk ete inaha esen-owo asaña ekpere Ataya oro, koro mmó ekedehede, Enye onyuñ edi edisana. Mme owo ekpekpaña edieke mmó ekpesañade ekpere. Ke ntre mme Levi ekenam nna mmó ekanade Ataya oro man ekpeme isen-owo esio ke mkpa.

Oyohó Ubak Duop Eke Nditó Israel

Abasi okoyom Nditó Israel ewut esit ekom ebaña utom mme oku ye mme Levi eken; ke ndiwut esit ekom, mmó ekenyene ndida oyohó mbak duop ke otu kpukpru mfri ye ufene mmó nsok mme Levi. Ekesida ndusuk mme eno emi enam uwa; ke ema ekeda esok Obon, akana nte eta se isuhode. Ubak kiet ke itie duop ke otu udori inyene Nditó Israel, akpa mbuñwum ye akpan oro edi enye emi okofonde akan akana nte edi udeme mme Levi.

Ke otu ubak duop emi mme Levi ekebode, mmó ekenyene ndisio ubak duop eke efonde ekan nno mme oku. Ke ntre ema etim ekama kpukpru mme Levi ye mme oku ke udeme emi Abasi okonimde ono mmó.

Owo ikenyeneke ndifre mbaña mme Levi. Abasi ama onim mme usoro emi eketide Nditó Israel kpukpru ini ete ke mmó inyeneke ndifre mbaña mme Levi ye mme ubuene, man mmó edia enyuñ edat esit ye mmó. “Adaña ini nte afo edidude ke ison fo, kpeme idem fo mbak afo ediduok mme Levite” (Deuteronomy 12:19).

Nte isede, Israel ema efre mme Levi ke mme ukperedem isua. Koro mmó ekesinde ndikpe oyohó mbak duop emi enyenede Jehovah, unana edim ama osim mmó. Abasi ama onwono ete, “Kpono Jehovah ke inyene fo, ye ke akpa ubak kpukpru mbuñwum fo: ndien ebiet-unim-nkpo fo eyeyohó kpak, obufa wine eyenyuñ oyohó ke ebiet-udigi fo oduohó” (Mme Nke 3:9, 10). Ke ini nnyin inamde Iko Abasi, edidion Esie enyene nnyin.

Abasi ama odohó Malachi, anditiñ ntiñ-nnim ikó ete etiñ ono Nditó Israel ntak emi isuñi, ye biñ ye udono osimde idut mmó. “Emeda isuñi esuñi mbufo: ndien mbufo ofuri idut emi eketuk mi.” Mmó eketuk Enye didie? “Ke oyohó mbak nkpo duop ye ke edimenerere uwa.” Edi mmó ikenyeneke nditie ke idiok itie mmó. Abasi ama owut mmó nte mmó ekpetonode ntak enyene akwa uforo. “Mbufo eda kpukpru oyohó mbak duop edisin ke ufok unim-nkpo, man udia odu ke ufok mi, ndien eda emi edomo mi, Jehovah mme udim odohó, mme ami ndiberekede window heaven nno mbufo, nnyuñ nñwaña nti nkpo nno mbufo, tutu akaha” (Malachi 3:8-10). Abasi akanam enwono emi ono Nditó Israel edi nnyin imekeme ndibo nnyene nko, koro nnyin idi ndito Abraham ke mbuotidem.

Uduak Abasi Ke Abañá Ufok Abasi Esie

Ke ini isede ke Iko Abasi, imokut ite ke oyohó mbak udop edi uduak Abasi ke abañá usuñ okuk Ufok Abasi Esie. Ndusuk owo enim ete ke ibet ndino oyohó mbak duop ekenyene Nditó Israel ikpon, edi nnyin imokot ite, ke ebode nkpo nte isua 600 mbemiso eno Ibet, Abraham ama ekpe oyohó mbak duop ono Melchisedec, Oku ata edikon Abasi (Mme Hebrew 7:1-6).

Jacob, ete Nditó Israel ama onwono ono Abasi ke Bethel ke ini enye okutde eberi eke osimde Heaven ke ndap esie ete ke imo iyekpe oyohó mbak duop ino Jehovah. “Ndien nyesio ubak kiet ke itie duop kpukpru se afo edinode mi, nda ntomo fi” (Genesis 28:22).

Ke ukperedem, Moses ama otono ntak etiñ osono uduak Abasi ke ndino oyohó mbak duop: “Ndien nko kpukpru ubak kiet ke itie duop ke ofuri ison, edide mkpasip inwan, onyuñ edide mfri eto, enyene Jehovah: enye edi edisana nkpo Jehovah” (Leviticus 27:30). Nnyin imokut ite ke oyohó mbak duop “enyene Jehovah.” Idighe okuo mme okim edi enyene Abasi. Edieke nnyin minohó Enye se idide Esie, Enye ididionke uwem nnyin. Ke akpaniko, Abasi ada nte itotuk Enye edieke itrede ndikpe oyohó mbak duop nno Enye. “Nte owo okpotuk Abasi, koro mbufo etukde Mi? Ndien mbufo edohó ete, Nnyin ikotuk fi ke nso? Ke oyohó mbak nkpo duop ye ke edimenerere uwa” (Malachi 3:8).

Mme Jew ema esikpe oyohó mbak duop ke ini Jesus okodude mi ke ison, ndien enye ama odohó mmó ete eka iso enam ntre. Edi Enye ama oyom se ikponde ikan oro oto mmó. Mmó ikanamke nkpo ino Abasi koro ima Esie mikoduhe mmó ke esit; ndien Jesus ama okot mmó mbon mbubik. “Eyedodiok ono mbufo, mme scribe ye mme Pharisee, mbon mbubik! Koro mbufo esiode ubak ikon ye mfri ye mkpasip kiet ke itie duop eno Abasi, enyuñ etrede

ndinam ikpọ nkpọ ibet, ikpe, ye mbom, ye mbuotidem. Edi mbufo ekpanam mme nkpọ emi, ikponyūn itreke ndinam mmọ eken” (Matthew 23:23).

Ndinọ ọyọhọ ubak duop ke kpukpru se inyenede ọfọn onyūn enen koro mmọ emi inyenede uwak ekeme ndinọ uwak, mmọ emi enyūn inyenede ekpri enyūn enọ se mmọ ekemede. “Kpukpru owo edi ye enọ ke ubok, ekem ye ufọn eke Jehovah Abasi fo ọfọnde fi” (Deuteronomy 16:17). Ebe-akpa oro ekesinde okudok iba ama ọbọ eridiōn ke ubok Jesus akan mbon inyene emi ekesinde uwak, koro mmọ ema enyene se iwakde ikan oro (Mark 12:42-44).

Ke Erinyime Esit

Abasi oyom nnyin inọ idighe koro enyikde-nyik nnyin edi oto ke ofuri esit nnyin koro nnyin imade enye. “Koro edieke erinyime esit odude, enem Abasi esit ndibọ enọ nte asaṅade ekekem ye se owo inyenede, idighe nte ebede ukeme esie” (2 Nwede Corinth 8:12).

Edieke idarade ibañā ima Abasi ye nnyin, iyeyom ndinọ kpukpru se ikemede man mbon efen ekut ima oro nkọ, oro edi ndikpe ọyọhọ mbak duop ke ima ye ke utom edinyime esit ye ke silver ye gold. Iyeyom ndisuan etop erinyaña ke ofuri ererimbot ke mme mboho eridemere, ke mme nwede emi emiñde, ke edisuan etop ke mme efak, ke ndika ke idem nnyin nkese mbon udọnọ ye mbon nkpọkọbi ye mbon ndiok-iso emi minyeneke usuñ efen ndikop Ikọ Abasi. Nnyin iyeyom nkọ ndiñwam mmọ emi ekpọnde obio mmọ eka ndisuan etop ke esen idut. Ke ndikpe ọyọhọ mbak duop, nnyin imekeme ndiñwam ke kpukpru mme utom emi; ndien ke ini iyakde uwem nnyin inyūn ibọnde akam eti-eti ite yak Abasi ọdiōn mkpasip emi etode, iyeda nsọn-urua ukpọn inọ Obio Ubọn Christ.

MME MBUME

1. Nso ikedi utom mme Levi?
2. Nso ikenyene ndidi udeme mmọ?
3. Ke ebede udia, nso efen ke mme Levi ekebọ?
4. Nditọ Israel eketuk Abasi didie ke mme ukperedem isua?
5. Nso idi ọyọhọ mbak duop?
6. Mme anie ekekepe ọyọhọ mbak duop mbemiso Nditọ Israel? Siak owo iba
7. Nte Jesus ama ọdọhọ mme owo ekpe ọyọhọ mbak duop?